

Ár 2010, mánudaginn 21. júní, var fundur í kjararáði að Hverfisgötu 6a í Reykjavík haldinn af Guðrúnu Zoëga, Jakobi R. Möller og Jónasi Þór Guðmundssyni.

Fyrir var tekið:

## Að ákveða laun og starfskjör ríkisskattstjóra

### I.

Samkvæmt 1. gr. laga nr. 47/2006 um kjararáð, sbr. 1. gr. laga nr. 168/2007 um breytingu á þeim lögum, er verkefni ráðsins meðal annars að ákveða laun forstöðumanna ríkisstofnana.

Með lögum nr. 136/2009 um breyting á lögum nr. 90/2003 um tekjuskatt og fleiri lögum var landið gert að einu skattumdæmi undir yfirstjórn ríkisskattstjóra. Þannig voru níu sjálfstæðar skattstofur sameinaðar embætti ríkisskattstjóra. Breytingin tók gildi 1. janúar 2010. Af þessu tilefni ákvað kjararáð að taka til skoðunar hvort þessar breytingar á skipulagi stofnana skattkerfisins ættu að leiða til breytinga á launakjörum ríkisskattstjóra.

### II.

Fjármálaráðuneyti var, með bréfi dagsettu 12. maí 2010, gefinn kostur á að koma á framfæri sjónarmiðum sínum. Með bréfi dagsettu sama dag var ríkisskattstjóra gefinn kostur á að koma á framfæri sjónarmiðum sínum. Jafnframt var óskað eftir upplýsingum um aukastörf og hlunnindi, sem starfinu fylgdu. Svar barst ekki frá ríkisskattstjóra.

Í bréfi fjármálaráðuneytisins, dagsettu 25. maí 2010, sagði að með breytingu á lögum nr. 90/2003 hefði landið verið gert að einu skattumdæmi undir yfirstjórn embættis ríkisskattstjóra. Lögð hefðu verið niður níu sjálfstæð skattstjóraembætti og starfsemi þeirra sameinuð embætti ríkisskattstjóra. Með endurskipulagningu á verkaskiptingu í skattkerfinu væri stefnt að aukinni skilvirkni og hagkvæmni við skattframkvæmd. Breytingarnar færu fram samhliða miklum efnisbreytingum skattalaga. Ljóst væri að öll þessi þróun hefði í för með sér aukið umfang og varanlega breytingu á verkefnum ríkisskattstjóra. Með sameiningunni færðist ábyrgð á skattframkvæmdinni frá níu skattstjórum á hendur ríkisskattstjóra, fjárheimildir embættisins ykjast um rúm 100% og starfsmönnum hefði fjölgað úr rúmlega 90 í um 270. Starfsstöðvar á ábyrgðarsviði ríkisskattstjóra væru nú á níu stöðum á landinu. Jafnframt hefðu skattalagabreytingar undanfarna mánuði kallað á aukið umfang embættis ríkisskattstjóra.

### III.

Eins og fyrr segir var skipulagi stofnana skattkerfisins breytt með lögum nr. 136/2009 um breyting á lögum nr. 90/2003 um tekjuskatt og fleiri lögum, þannig að embætti níu skattstjóra og ríkisskattstjóra voru sameinuð í eitt embætti, þ.e. embætti ríkisskattstjóra. Yfirstjórn embættisins verður í Reykjavík, en áfram verða reknar starfsstöðvar í hverjum landshluta. Í frumvarpi því sem varð að áðurnefndum lögum nr. 136/2009 segir að við endurskipulagningu skattumdæma og breytta verkaskiptingu hefðu þrjú markmið verið lögð til grundvallar: Að lækka kostnað við rekstur skattkerfisins í heild þannig að hann rúmist innan fjárheimilda sem koma til með að skerðast á næstu árum; að fækka óhagkvæmum rekstrareiningum, en efla enn frekar þær einingar sem eftir standa; að tryggja áframhaldandi árangur og skilvirkni skattyfirvalda. Þá segir að með endurskipulagningu á verkaskiptingu í skattkerfinu sé stefnt að aukinni skilvirkni og hagkvæmni við skattframkvæmd.

#### IV.

Í 8. gr. laga um kjararáð segir, að það skuli við úrlausn mála gæta innbyrðis samræmis í starfskjörum þeim sem það ákveður, og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Við ákvörðun sína skal kjararáð gæta þess að föst laun fyrir dagvinnu, annarra en forseta Íslands, verði ekki hærri en föst laun forsætisráðherra skv. 3. gr. Við ákvörðun launakjara samkvæmt 4. gr. laganna skuli sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs samkvæmt 3. gr. hins vegar. Þá skuli kjararáð ætíð taka tillit til almennrar þróunar kjaramála á vinnumarkaði.

Í 10. gr. laga um kjararáð segir að ráðið skuli taka mál til meðferðar þegar því þyki þurfa og ætíð ef orðið hafa verulegar breytingar á þeim launum í þjóðfélaginu sem höfð skulu til viðmiðunar samkvæmt lögunum eða á störfum þeim sem úrskurðarvald þess tekur til.

Í ákvæði til bráðabirgða segir að þrátt fyrir ákvæði 8. og 10. gr. skuli kjararáð fyrir árslok 2008 kveða upp nýjan úrskurð er feli í sér 5–15% launalækkun alþingismanna og ráðherra er gildi frá 1. janúar 2009. Jafnframt skuli kjararáð endurskoða kjör annarra er undir það heyra, til samræmis. Til og með 30. nóvember 2010 sé óheimilt að endurskoða úrskurði kjararáðs sem kveðnir hafi verið upp á grundvelli 1. másl. 1. mgr. til hækkunar.

Með áðurnefndum breytingum á lögum um tekjuskatt hefur embætti ríkisskattstjóra breyst þannig að í raun er um nýtt embætti að ræða og því tilefni til að ákveða laun ríkisskattstjóra á ný. Með breytingunum var skattumdæmum fækkað úr níu í eitt og embætti níu skattstjóra sameinuð embætti ríkisskattstjóra. Við ákvörðun launa ríkisskattstjóra hefur verið tekið tillit til aukins umfangs embættisins. Auk þess hefur kjararáð meðal annars haft hliðsjón af launum ráðuneytisstjóra og tollstjóra, en tollumdæmum var fækkað úr átta í eitt 1. janúar 2009.

Með hliðsjón af framansögðu hefur kjararáð ákveðið að laun ríkisskattstjóra skuli vera sem segir í ákvörðunarorði.

#### V.

##### Ákvörðunarorð

Frá og með 1. janúar 2010 skulu mánaðarlaun ríkisskattstjóra vera samkvæmt launaflokki 502-140, nú krónur 806.230. Að auki skal greiða honum 10 einingar á mánuði fyrir alla yfirvinnu er starfinu fylgir.

Eining er 1% af launaflokki 502-126 nú 5.058 krónur. Einingar greiðast alla mánuði ársins, einnig í sumarleyfi. Af því leiðir að ekki er greitt orlofsfé á einingar.

Laun eru við það miðuð að um fullt starf sé að ræða og þannig ákveðin að ekki komi til frekari greiðslna nema kjararáð úrskurði um það sérstaklega.

Um almenn starfskjör ríkisskattstjóra gilda reglur kjararáðs frá 30. maí 2007.

---

Guðrún Zoëga

---

Jakob R. Möller

---

Jónas Þór Guðmundsson